

Paamiut pillugit isumaqatigiissut 2020 pillugu killiffik

Kalaallit Nunaanni Peqqinnissaqarfiup Kommuneqarfik Sermersuullu akornanni suleqatigiinnissamik isumaqatigiissut

Aallaqqaasiut:

Paamiut pillugit isumaqatigiissut tassaavoq Kalaallit Nunaanni Peqqinnissaqarfiup Kommuneqarfik Sermersuullu akornanni suleqatigiinnissamik isumaqatigiissut, taannalu 2019-imi juunimi atuutilersinneqarpoq. Peqqinnissaqarfiup Kommuneqarfik Sermersuullu akornanni qanimut suleqatigiinnissaq illuatungeriinnit anguniagaavoq, taamaattumillu Paamiut pillugit isumaqatigiissut alloriarneruvoq pissanganarluinnartoq.

Kommuneqarfik Sermersooq 2019-imi Paamiuni utoqqaat illuat nutaaq ammaanersiorpaa. Utoqqaat illuat peqqissaavimmuut atasussanngorlugu sananeqarpoq. Tamanna toqqammavigalugu kommunip peqqinnissaqarfyllu akornanni suleqatigiinnerulernissaannut tunngatillugu Paamiut siuttunngortinneqarpoq.

Paamiut pillugit isumaqatigiissut politikikkut 2019-imi juunimi atuutilersinneqarpoq, tamatumani aalajangerneqarpoq:

”Isumaqatigiissut allaffissornikkut aqutsisunut suleqatigiinnissamut periarfissanik, ilanngussaq 1-imi allasimasuni, misissuinissamut pisussaaffiliivoq, kiisalu suleqatigiinnermit suut isumaqatigiissutaasimanersut pillugit ukiumoortumik killiffimmik nalunaarusiortarnissaq.”

Killiffimmuut nalunaarummi matumani immikkoortut suleqatigiissutigineqartut kiisalu suleqatigiinnissamut suliniutit arlallit siunissami suliarineqartussat nassuiaatigineqassapput.

Suleqatigiinnerup killiffiani pingaarnert

Paamiut pillugit isumaqatigiissut naapertorlugu suleqatigiinnermik suliaqarneq ajornakusoorsinnaavoq, tassa oqartussat assigiinngitsut akornanni sulisut aqutsisullu ataqatigiissaarisartussaammata suleqatigiillutillu. Suleqatigiinneq iluatsilluassappat allannguinnissamut piareersimanissaq naleqqussaasinnaanerlu piumasaaqaatit ilagaat. Suleqatigiinnissamut piunassuseq pigineqarpoq, naammagisimaarnarporlu siunissamullu isumalluarnarluni aqutsisut Peqqinnissaqarfiup Kommuneqarfik Sermersuullu akornanni pitsaasumik oqaloqatigiittarnerit ingerlanneqartartut nassuiaateqarmata.

Aallartisarnermi ajornartorsiutaasimasut amerlanerit iluarsineqareerput, taavalu sulisut aqutsisullu immikkoortuni assigiinngitsuni suleqatigiippu. Assersuutigalugu weekendini utoqqarnut nerisassanik pajuttisarnerit, tassani portørit utoqqaat illuanut ikiuuttarput. Utoqqaat illuanni timimik sungiusaasup sungiusarnermi atortut pisariaqartinneqarnerpaat maanna tamakkingajallugit pigilerpai, taamaalilluni utoqqaat illuanni najugaqartut peqqissaavimmilu sullinneqartut sungiusarnissaannut periarfissaqarpoq.

Immikkoortoqarporli iluarsisassanik. Matumani ilaatigut errorsisarnermut aqqissuussaq naleqqunnerusumik pilersarusiorneqarsinnaanera pineqarpoq, tassa suleqatigiaat ulloq unnuarlu errorsisarfirmik atuisarnerat piffissani assigiinngitsuni pisarsinnaavoq. Tamatuma saniatigut ataatsimoorussamik unnuami vagtimik aggersarneqarsinnaasumik peqalernissamut anguniakkap piviusunngortinnissaa ajornartorsiutaavoq, teknikikkut atortut - nakkutiginninnermi atortut kiisalu atortut oqaloqatigiinnissutit - suli inissinneqanngimmata. Ajornartorsiutip aqqiissuteqarfiginissaa assut pingaartinneqarpoq, aamma Utoqqaat pillugit immikkoortortamit suliap malitseqartinnissaa maanna sulissutigineqarpoq.

Suleqatigiinnissamut killiliussap - pisussaaffillu - politikikkut aalajangiussaapput, najukkamilu aqutsisut isumaqatigiissutit ersarissartussaavaat atuutilersillugillu. Taamaattumik Peqqinnissaqarfiup ulloq 1. maaji 2020-miit immikkoortortaqarfimmi peqqissaasumik, Paamiuni aalajangersimasumik najugaqartumik, atorfinitsinera assut isumalluarnarpoq. Kommunimi Utoqqaat pillugit immikkoortortaqarfimmi fagchefip kiisalu Paamiuni najukkami aqutsisooqatigiit juunimi immikkoortortaqarfimmi peqqissaasumik nutaamik ataatsimeeqateqarnissaq pilersaarutigaa. Matumani suleqatigiinnermut atatillugu aalajangersimasumik ataatsimiittarfissat pilersaarusiorneqassapput. Ataatsimiinnerni taakkunani tamakkiisunut kiisalu aalajangersimasunut tunngasut pillugit suleqatigiissutigineqartut pitsaanerulersinneqarnissaannut oqaloqatigiillutillu aalajangiisassapput. Matumani ilaatigut killiffik pillugu nalunaarusiaq una iluarsivigineqartussatullu taaneqartut toqqammavigineqassapput.

Paamiut pillugit isumaqatigiissummi illuatungeriit ilanngussaq 1-imi immikkoortut suleqatigiissutaasinnaasut saqqummiuppaat. Paamiuni najukkami aqutsisut ilanngussap taaneqartup aaqqissugaanera malippaat, taamatullu sulerieseqarnek matumani killiffik pillugu nalunaarusiami atornerqarpoq.

Suliniutit aalajangersimasut

1) Ataatsimoorussamik unnuami vagti aggersarneqarsinnaasoq

Utoqqaat illuanni unnuami sulisut marluusarput. Marlunnik unnuami sulisoqarnissaanut pisariaqartitsisoqarneranut pissutaavoq, utoqqaat illuat puiguttortunut immikkoortortaqarmat, tassanilu ulloq unnuarlu ikinnerpaamik ataatsimik sulisoqartuaannartussaavoq. Tamatuma saniatigut utoqqaat illuat ataatsimik unnuami vagtimik aggersarneqarsinnaasumik peqarpoq. Saniatigullu unnuami vagtiusartut angerlarsimaffimmi vagtimut sianersinnaasarput aqagumut utaqqissunneqarsinnaanngitsunik apeqqutissaqaraangamik. Taakku suliatigut ajornartorsiutaasinnaasunut tunngassuteqakkajuttarput, assersuutigalugu innuttaasoq puiguttortoq eqqissisimangitsoq pillugu. Vagti aggersarneqarsinnaasoq utoqqaat illuannukartarpoq suliap naammassinnaanut pisariaqartutut nalileraangamiuk. Peqqissaavimmi unnuami ataatsimik sulisoqartarpoq.

Unnuami sisamanik amerlatigisunik sulisoqartarmat unnuami vagtiusartumut tunngatillugu suleqatigiinnissamut periarfissat misissornissaannut peqqutissaqarluarpoq. Nakkutiginninnermi atortoqarnissaq kiisalu atortut oqaloqatiginissutit pisariaqartinneqartut isumaqatigiissuteqartunit paasineqarpoq. Tamatumunnga pissutaavoq qaqugukkut napparsimmavimmut unittoqartassanersoq sulisut siumut ilisimareersinnaannginnammikku, taamaattumillu unnuami vagti unnuaq tamaat sillimasuusaariaqartarpoq. Taamaalilluni sulisoq unnuaq naallugu napparsimmavimmiittariaqartarpoq.

Maannamut teknikikkut atortut akornutaanerpaapput. Utoqqaat pillugit immikkoortortaqarfiup kommunimi Sanarfinermut Avatangisnullu Ingerlatsivimmit akissuteqartoqarnissaa utaqqivaa. Utoqqaat pillugit immikkoortortaqarfimmi fagchefip suliap malitseqartinneqarnissaa isumagissavaa. Ataatsimoorussamik unnuami vagtimik aggersarneqarsinnaasumik peqarnermi annertuumik iluaqutaasinnaasunik pissarsinissaq periarfissaqarluarpoq. Taamaattumillu aaqqiissummik nassaarnissaq assut pingartinneqarpoq.

2) Ataatsimut piginnaasanik ineriartortitsineq / pikkorissarneq

Utoqqaat illuanni peqqissaavimmi sulisut ataatsimut ilinniartinneqartarnissaq pillugu iliuuseqarnerusinnaapput. Assersuutigalugu kommunimi timimik sungiusaasoq nuussinernut tunngasunik ilinniartitsisarsinnaavoq, peqqissaasullu quup aqputaatigut aseruunnerit pinaveersaartinneqartarnissaat pillugu ilinniartitsisinnaallutik imaluunniit sulisunut qanoq inuunermut pingaarutilinnik uuttortaanerit ingerlanneqarsinnaasut takutissinnaavaat.

Ataatsimiinnerni, sulisut pisariaqartitaat kissaataallu oqaluuserineqarneranni, pilersaarusiorneq ingerlanneqartassaaq.

3) Iluaqusersuutit

Iluaqusersuutit uninngasunut nassartinneqartarnerat, tassa uninngasut angerlartinneqareeraangata iluaqusersuutit tigummiinnartarnerat, misilittagaqarfigilluarneqarpoq. Siornatigut innuttaasoq peqqinnissaqarfimmiit utoqqaat illuannut nuukkaangat innuttaasup iluaqusersuutinik qinnuteqaqqittaraluarpoq. Taamaalilluni ilaatigut innuttaasoq iluaqusersuutinik nutaanik utaqqisariaqartarluni. Iluaqusersuutit pillugit suleqatigiinnikkut utaqqineq pinngitsoortinneqartarpoq, iluaqusersuutinillu tigummiinnarnissaannut periarfissaq utoqqaat illuanni najugaqartunut kiffartuussinermik pitsanngorsaataavoq.

Suliani uninngasup/innuttaasup pisariaqartitai oqaluuserineqarnerini peqqinnissaqarfiup kommunillu akornanni oqaloqatigiinnerit ataavartut ingerlanneqartarneri pillugit tamanna iluatsippoq. Tamatuma saniatigut iluaqusersuutit toqqorsivimmiitinneqartartunik aqutsineq ataavartumik kommunip peqqinnissaqarfimmiit akornanni ataqatigiissaarneqartarpoq. Taamaaliornikkut iluaqusersuutit ataatsimut malinnaaffigineqarsinnaanngorput, taamalu naatsorsuutaanngitsumik amigaatigineqarnissaat annikillisarneqarsinnaavoq.

4) Timimik sungiusaasoq/sungiusartarfiit

Ataatsimoorussanik sungiusartarfeqarneq aamma timimik sungiusaasoqarneq ingerlalluarput. Atortunik nutaanik peqalerpoq, taamaalilluni timimik sungiusaasup atortut pisariaqartinneqartut amerlanersaat pigilerpai. Timimik sungiusaasoqarneq atortunillu eqqortunik atuilluni sungiusarneq utoqqarnut assut iluaqutaavoq. Sungiusarnikkut najugaqartut piginnaasaat attanneqarsinnaapput pitsaanerulersinneqarlutilluunniit, taamalu najugaqartut inuunerannut pitsaanerulersitsissalluni. Piginnaasat annertusigaangata ulluinnarni najugaqartut unammillernarsinnaasut namminersorlutik qaangeruminartissinnaasarpaat. Taamatuttaaq sulisut pisariaqartitsinerpaaffinni ikiuinissaq pingaartinnerussavaat.

Timimik sungiusaasumik sungiusartarfinnillu ullumikkut aningaasaliineq siunissami nuannaarnermik pisariillisaanermillu pilersitsissasoq naatsorsuutigineqarpoq.

5) Paarlakaajaannissamik aaqqissuussinerit

Matumani paarlakaajaannissamik aaqqissuussinerit sulisut Paamiut avataaneersut pineqarput, assersuutigalugu Nuummiit Danmarkimiilluunniit piffissami aalajangersimasumi Paamiuni sulisartunut tunngalluni. Peqqinnissaqarfimmi sulisunut Nuup Paamiullu akornanni paarlakaajaannissamik aaqqissuussinerit ingerlalluarput. Kommuneqarfik Sermersuumi sulisunut paarlakaajaannissamik aaqqissuussinerit ingerlanneqanngillat, utoqqaat illuat aalajangersimasunik sulisoqarmat.

Utoqqaat illuat peqqissaavillu annertunerusumik illuatungerisat qanoq pisariaqartitsinersoq isumalluuteqarnerorlu pillugit ilisimasaqarnerulernissaq anguniagaavoq. Assersuutigalugu tamatuma kingunerisinnaavaa utoqqaat illuini sulisut sulisunit ilinniartinneqartarnissaat - sulisunit aalajangersimasunit tikittartunillu - peqqinnissaqarfimmit akerlianullu/akerlianiilluunniit. Innersuussutigineqarsinnaasut ilagaat peqqinnissaqarfik sulisunik immikkut ittunik piginnaanilinnik Paamiuliartitsigaangami, qulequttani aalajangersimasunik kommunimi sulisunik atuartitsisarsinnaanannut tunngasoq. Aalajangersimasunik suli suliniuteqartoqanngilaq, illuatungeriilli tamanna malitseqartissavaat.

6) Ineqartitsineq

Illuatungeriit sulisunut aalajangersimasunut inissianik ikioqatigiinniarlutik kiisalu sulisuugallartunut utaqqiisigalugu inissianik atorqeersinnaasunik piareersimasuuteqarniarlutik isumaqatigiissutigaat. Iserit Inissianik aamma

utaqqiisigalugu inissianik aqutsisuuvoq. Maannamut peqqinnissaqarfiup kommunillu illuatungerisap inaataannik attartornissartik pisariaqartissimangilaat, pisariaqartitsisoqalerpalli periarfissaasoq isumaqatigiissutaavoq.

7) Kiffartuussiviit (facility management)

Peqqinnissaqarfik pingasunik piffissaq tamaat sulisartunik portøreqarpoq, kommunilu ataatsimik piffissaq tamaat sulisartumik pedelearluni. Peqqinnissaqarfiit portørit weekendini nerisassanik pajuttuisarnerit isumagisarpaat. Taamatut aaqqiissut utoqqaat illuannit ingerlalluartutut isigineqarpoq. Nerisassanilli pajuttuinermi ambulancit atorneqartarneri portørit naammagittaalliutigineqarpoq, taakku isumaqaramik ambulance taamaallaat napparsimasunik angallassinernut atorneqartassasoq. Tamanna pillugu najukkami aqutsisut utoqqaat illuata bussii weekendini nerisassanik pajuttuinermit atorneqarsinnaanersoq eqqarsaatigaa.

Utoqqaat illuat aalajangersimasumik pedelearpoq. Pedeli sanasutut ilinniarsimasuummat annikitsunik iluarsaassisarnissaa pilersaarutaavoq. Portørit suliaannik aamma oqilisaassisassaaq, pedelip najugaqartut pisariaqartitsineranni illoqarfimmut angallassinnaagamigit. Pedelip ulluinnarni nerisassanik pajuttuisarneq aamma isumagisarpa. Utoqqaat illuat napparsimmaviullu imminnut atanerat iluaqutaavoq, taamaalilluni utoqqaat illuanni najugaqartoq napparsimmavimmi uninngariarluni utoqqaat illuanut utileraangat ambulance pisariaqartinneqarneq ajorpoq.

Suliffeqarfiit assigiinngitsut akoranni portørit pedelillu piginnaasaat sapinngisamik atorluarneqassasut illuatungeriit eqqumaffigaat. Suliniutit siuliini taaneqartut taamaattoqarsinnaaneranik takutitsisuupput. Siunissami taakkununnga allattorsimasunut suliniutit amerlanerit ilanngunnissaat illuatungeriit pingaartitaraat.

8) Annertuumik ingerlatsinermik iluaqutissat

Utoqqaat illuanniit nerisassanik peqqissaavimmi uninngasunut pajuttarnermut tunngatillugu, peqqinnissaqarfimmi sulisunit pitsaassusaat, annertussusaat poortorneqartarnerilu naammagittaalliutigineqarsimapput.

Utoqqaat illuanni pisortap, igaffik suleqatigalugu, ajornartorsiutit iluarsiiviginiarsimavai. Poortuutaat ataasiaannartagaajunnaarsimapput, amerlineqarlutillu. Nerisaqartitsineq pillugu suleqatigiinneq naammagisमारinninnerlu pillugit 2020-mi aasap kingorna nalilersuisoqaqqissaaq. Matumani uninngasunut utoqqaat illuannilu najugaqartunut nerisassat inuussutissaqarlutillu illinnartuunissaat anguniagaavoq.

Arlalinnik uninngasoaqartillugu peqqinnissaqarfiup utoqqaat illuanni errorsisarfirmik atuinissaq pisariaqartissimavaa. Tamanna sulisut akornanni aaqqiagiinnginnermik pilersitsisimavoq, suleqatigiikkuutaat tamarmik piffissami aalajangersimasumi ininik atuinissaminnut ataatsikkut pisariaqartitsisimammata. Taamaattumik siunissami errorsisarnermut tunngatillugu pilersaarusiortarneq pitsanngortinniarlugu pingaarnerutinneqassaaq, taamaalilluni errorsinissamut pisariaqartitsineq ullormut agguataarneqartalerluni.

Ataatsimut eqqiaasarnermut tunngatillugu suleqatigiinnermi ajornartorsiuteqartoqarsimavoq. Unammillernartut amerlanerit iluarsineqarput. Ataatsimut eqqiaasarneq ingerlanneqartarpoq peqqinnissaqarfimmi eqqiaasartut marlunnagornikkut tallimannagornikkullu ullaap tungaani eqqiaasarlutik. Taamaallaat peqqinnissaqarfimmi sulisut suliffiit assigiinngitsut akornanni sulisarput. Utoqqaat illuat marlunnik eqqiaasartunik sulisoqarpoq, taakkulu piffissap sinnera eqqiaasarput utoqqaat illuanni.

Coronamillu nalaataqarneq eqqiaasarnermik aaqqiissummik unitsitsigallarpoq. Piffissami tassani Utoqqaat pillugit immikkoortotaqarfik utaqqisaasumik eqqiaasumik vikarimik atorfinitsitsivoq. Aaqqiissut ulloq 1. juuni 2020 atuutilersinneqarqinnissaa pilersaarutaavoq.

Eqqiaasarnermut aaqqiissut suleqatigiinnermi isumalluutunik atorluaanermik assersuutitsialaavoq. Aaqqiissummi matumani kommune minnerpaamik ataatsimik eqqiaasumik sipaaruteqarpoq, peqqinnissaqarfillu taakkuninnga marlunnik attassiniaanermut naammattunik suliassaateqarluni.

Tamanna aatsaat pisinnaavoq, suleqatigiinneq pitsaasumik oqaloqatigiinnermik siunissamullu ungasinnerusumik anguniagaqarnermik imaqartillugu ingerlanneqarpat.

9) Ininik, pisattanik assersuutigalugulu iluaqusersuutunik aserfallatsaaliuinerit

Suliffeqarfii akornanni aserfallatsaaliuinerit suliassanut tunngatillugu utoqqaat illuanni pedeli atorneqarsinnaavoq. Suleriaatsit ilagisinnaavaat sulisut sanasumut sianinnginneranni suliassaq pedelip sularisinnaaneraa paasiniaqqaartarlugu.

10) Nakorsaatit

Kalaallit Nunaanni peqqissutsimut oqartussaqaarfimmit qullersanit nakorsaatinik annertussusiliisarneq peqqinnissaqarfimmi atorfilimmit peqqissaasumit isumagineqartassasoq piumasqaataavoq. Tassa imaappoq Paamiuni Peqqissaavik utoqqaat illuanni najugaqartunut nakorsaatinik annertussusiliisartuupput. Nakorsaatinik annertussusiliisarnermut tunngatillugu kommunip peqqinnissaqarfillu akornanni suleqatigiinneq ingerlalluarpoq.

Utoqqaat illuanni nakorsaatit allattorsimaffii takuneqarsinnaanngillat, peqqinnissaqarfiup journalinut systemiannut Cosmic-imut takunnissinnaanermut akuersissummik peqarnissaq piumasqaataammat. Kommunimi sulisut toqqakkat Cosmic-mut isersinnaanissaannut tunngatillugu misissuinerit ajornakusoorlutillu arlalitsigut unammillernartuusimavoq. Tamanna aamma Peqqinnissaqarfimmik isumaqatigiissut 2017-2021-meersoq naapertorlugu kommunimut tamarmut suleqatigiissutaasussat ilagaat.

Taamaalilluni Paamiuni najukkami illuatungeriit nakorsaatit allattorsimaffinut isernissamut akuersissutinut aaqqiissutissanik ujartuinissamut akisussaasuunngillat. Paamiunili utoqqaat illuata, kommunimi utoqqaat illui sinneri assigalugit, Cosmis-imut isernissamut akuersissuteqarnissaq iluaqutigissavaa.